

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

19 Octobre 2018

09 Safar 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : « *Bon Comportement* ».

Mo fine choisir pou adresse zot azordi dans sa Khutba Jummah là lor « *Bon Comportement* ». Sak bon musulman bizin à tout prix ena ene bon comportement dans so la vie de tous les jours. Li bizin comprend ki le bon comportement dans la vie lor sa la terre là li essentiel pou vive ene la vie honorable. Ene musulman, de surcroît, ena le devoir sacré pou ena bon comportement parski ena là-dans bane hautes valeurs morales.

Et sa bane valeurs morales là ena ene l'importance particulier. Zot représente bane signes du bonheur et de réussite dans sa la vie lor sa la terre là mais beaucoup plus dans *Aakhérat* aussi. Fine rapporté ki nous bien-aimé prophète Hazrat Muhammad (saws) fine dire : « *Mo fine être envoyé pour parfaire bane hautes valeurs morales.* ». (Musnad Ahmad).

Li fine aussi dire : « *Bane ki pou pli chers et ki pou pli proches avec moi Jour Jugement, c'est bane ki ena bane meilleurs comportement.* » (Tirmidhi).

Kan so bane compagnons ti pose li question concernant ki kitchose ki pli ena valeur (devant Allah) et ki pou fer ene dimoune rentre dans paradis, le Saint Prophète (saws) fine réponne : « **Taqwa** (piété – la crainte d'Allah) et bon comportement. » (Tirmidhi, Ibn Majah).

C'est pourquoi ene musulman bizin porte ene l'attention spécial à tout saki concerne bane valeurs morales et li bizin accorde zot ene l'importance particulier parski zot représente bane signes du bonheur et de la réussite dans sa le monde là et dans *Aakhérat*.

Bane hautes valeurs morales Islamiques repose lor quatre piliers ki réparti dans quatre Hadiths, kot sakaine d'entre zot désigne ene pilier parmi sa bane piliers là.

Abu Hurairah (ra) rapporté ki Rassoollullah (saws) fine dire : « **Ki celui ki croire dans Allah et dans le Jour du Jugement Dernier dire seulement kitchose de bien, ou sois li reste tranquille.** Ki celui ki croire dans Allah et dans le Jour du Jugement Dernier traite so bane voisins avec bonté (respect). Ki celui ki croire dans Allah et dans le Jour du Jugement Dernier donne l'hospitalité à so invité. » (Bukhari, Muslim).

Abu Hurairah (ra) rapporté ki Rassoollullah (saws) fine dire : « **Li forme partie de la beauté d'ene dimoune so l'Islam le fait pou évite saki pas concerne li.** » (Tirmidhi, Ibn Majah, Ahmad).

Abu Hurairah (ra) rapporté: Ene dimoune fine dire le Prophète (saws): « **Donne moi ene conseil** » ; Alors li (saws) fine réponne : « **Pas mette toi en colère.** » Dimoune là plusieurs fois fine demande même zaffaire, et le prophète (saws) fine à sak fois dire : « **Pas mette toi en colère.** » (Bukhari, Muslim).

Anas ibn Malik (ra) rapporté ki Rassoollullah (saws) fine dire : « **Aucaine d'entre zot pas pou croire ziska séki li content pou so frère saki li content pour li-même.** » (Bukhari, Muslim).

Si ene croyant réuni en li sa bane piliers du bon comportement là, sa bane conseils pour ene haute moralité, alors c'est ene grand réussite ki li pou atteindre, ki li dans sa le monde là et dans *Aakhérat*. Kan nous appiye nous lor sa bane Hadiths, ki bane piliers de bon comportements, nous retrouve aussi bane les autres piliers lor ki repose bane hautes valeurs morales dans l'Islam.

Allah et So Rassool (saws) incite nous à la piété, et pou acquérir ene bon moralité et la droiture. Le bon comportement c'est saki faire ene croyant saki li été et après ki li fine cultive dans li la foi islamique d'ene façon solide et sincère. De ce fait li obligatoire lor nous pou veiller à séki bane membres de nous lé corps pas servi pour répanne le mal autour de nous. En plisse de sa, nous bizin contrôle nous l'esprit aussi pou pas pense mauvais et pou pense zis le bien de bane les autres. Donc, nous bizin :

(1) Préserve nous la langue contre bane paroles n'importe, pareil couma bane palabres, *Ribat* (médisance) et dire bane paroles initiles, ki non-constructif. Sa partie de lé corps de l'homme ki pas ena les z'os et ki prend liberté pou danser dans so la bouche couma li oulé, trop souvent dire bane bêtises, bane mensonges, bane causer ki fer fracas ki pas faire Allah (swt) plaisir ditout. Zot bizin causer zis kan zot bizin, kan li nécessaire, sinon zot bizin reste tranquille. Zot bizin contrôle zot la langue pou pas dire bane bêtises et blesse bane les autres.

Au sujet de sa la langue là, le Saint Prophète (saws) fine être très clair dans so bane dire : **« Ki celui ki croire dans Allah et dans le Jour du Jugement Dernier dire seulement kitchose de bien, ou sois li reste tranquille. »** (Bukhari, Muslim).

Saki amène nous pou comprend d'ene façon bien claire, sans équivoque (sans zigzag) ki n'importe ki sanlà pas contrôle so la langue pas pou faire partie de bane dimounes de bien ki ena ene bon moralité. C'est pour sa ki li dans l'intérêt de sak croyant pou réfléchi bien lor so bane paroles avant ki li causer. Donc, réfléchi bien avant causer attention ou risquer dire kitchose ki ou capave pli tard regretter et ki pou enregistrer couma ene mal pour ou auprès d'Allah. En vérité, Allah dire dans Quran Shareef : **« Ô bane croyants! Gagne la crainte d'Allah et cause avec droiture. »** (Al-Ahzab 33 : 71).

(2) (Nous bizin) reste loin avec curiosité. La curiosité c'est le pire de bane vices. Ene croyant pas bizin mêle li de saki pas concerne li. D'ailleurs, ene dimoune ki curieux développe ene mauvais mentalité pou cause inutilement et bêtement. Zamais li pou vine ene dimoune ki commande le respect (c'est-à-dire, ki mérite le respect de bane les autres). En effet, so curiosité et le fait ki li mêle li de saki pas concerne li, écarte li de la vertu. Et kan li éloigne li de tous sa bane vices là, li pou vine ene dimoune avec bon manière, bon conduite, respectable, courtois, pieux et rempli avec l'amour pour Allah (swt). Et en vérité, li pou certainement faire partie

du cercle de bane croyants parski Rassoollullah, Hazrat Muhammad (saws) fine dire : « *Li forme partie de la beauté d'ene dimoune so l'islam le fait pou évite saki pas concerne li.* » (Tirmidhi, Ibn Majah, Ahmad).

(3) Ene croyant bizin empêche li-même pou céder à so bane impulsions de colère. Kan ene croyant en colère, li nervé, alors li risquer dire bane bêtises, ki li pou bien regretter après. La colère dévore bane bon actions et donne Shaytane le dessus lors bane agissements de sa dimoune là. Saki amène ene dimoune ki laisse li céder à la colère pou écarte li du bon comportement et d'ene conduite vertueux.

Nous bien-aimé prophète Hazrat Muhammad (saws) fine donne nous plusieurs solutions contre la colère. Parmi, ena ceci : « *Mo conne ene parole ki, si sa dimoune là prononce li, pou disperse so colère. Sa parole là c'est : Mo cherche refuge auprès d'Allah contre Satan le maudit.* » (Bukhari, Muslim).

« *Si ene d'entre zot en colère, alors li bizin reste tranquille.* » (Tirmidhi, Abu Dawood & Ahmad).

Mais ena ene exception à sa règle là concernant l'implémentation de bane commandements d'Allah. Imam Bukhari, Muslim et bane les autres compilateurs de Hadiths fine mentionne sa fait là : « *Le Prophète zamais ti pé en colère pour quoi que se soit. Mais kan bane interdits d'Allah ti pé violé, alors nannié pas ti capave résister à so colère.* »

(4) Ene croyant bizin persévérer pour acquérir la sérénité du cœur. Faudé pas li ena kit rancune, ni animosité ou bane mauvais sentiments envers qui que ce soit – croyants ou non-croyants. Le cœur li le siège (centre) de la foi ou de l'impiété, et c'est saki nous *Rab* (Allah) guetter dans l'homme. Le Saint Prophète (saws) fine dire : « *Allah pas guette ni zot lé corps ni zot l'apparence, mais li guette zot les cœurs* », en indiquant so la poitrine avec so lé doigt. (Muslim).

Celui ki renferme dans so lé cœur bane mauvais sentiments contre so frère musulman ou quelques pensées ki corrompu pas pou capave faire partie de bane dimounes ki ena ene conduite vertueux, parski souyure (noireté) ki trouve au pli profond de li-même, et so déviance influence aussi so l'aspect extérieur. Saki cachiette dans so lécoeur manifester lor so figure et so bane actions. En vérité, nous bien-aimé prophète Hazrat Muhammad (saws) fine dire : « *En vérité, ena dans lé corps dimoune ene morceau la chair ki, si li en bon l'état, permette à*

lécorps en entier pou prospérer et ki, si li en mauvais l'état, corrompe li en entier, (et sa morceau la chair là) c'est lé cœur. » (Bukhari, Muslim).

De ce fait, nous ena le devoir, nous, bane croyants pou content nous bane frères en Islam, et pou souhaite le meilleur de sa la vie là et de *Aakhérat* pour zot, et comme dit le Saint Prophète (saws) : **« Aucaine d'entre zot pas pou croire ziska séki li content pou so frère saki li content pour li-même. »** (Bukhari, Muslim).

Nous bizin alors faire de nous mieux, moi et ainsi ki zot tous mo bane chers disciples et bane musulmans du monde entier pour établir le bon comportement et tous so bane piliers ki pou guide nous vers le droit chemin. Gagne bane bons comportements (comporte zot de la meilleure façon) afin ki zot vine bane vrais musulmans, bane Sahih al Islam (vrais croyants), afin ki zot réfléchir dans zot, l'essence même de l'Islam, avec ene lé cœur pur et sain. Et sa pou vini avec zot connexion avec Allah, kan zot pou attache zot avec Li dans zot bane la prières et dans zot bon comportement envers zot bane familles, zot bane voisins, zot bane camarades, zot bane collègues et la société ki zot pé vivre. Vive bien d'après bane l'enseignements d'Allah et Allah pou aide zot dans tous bane sphères de zot la vies. *Insha-Allah. Ameen.*